



KNP VAIHAWM KIKHAWP 9-VEINA, NEW LAMKA KOCHUAM BIAK-IN



KCHRISTIAN LABU (TONIC SOLFA) LATNA PROGRAMME (7-03-2024)

To,

If undelivered please return to - TPC Office,
 P.O. Box - 107
 D. Phailian,
 Churachandpur - 795128
 Manipur, India



HIATPITU GINUM

- Khanglaite : Kochuam leh Nam kinepna
- Bible ah kile kit in
- Gam leh gua kiti hi Lalpa Pathian â a hi

Editor : Rev. S. Lama Vaiphei, Executive Secretary
Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hawipakkim, Secretary, CKNP
 : Upa Genminlun, Secretary, CKKP
Business Manager : Pu Lalbiaklian, Office Superintendent
 TPC Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. HIATPITU GINUM	03
4. KHANGLAITE : KOCHUAM LEH NAM KINEPNA	08
5. BIBLE AH KILE KIT IN	12
6. GAM LEH GUA KITI HI LALPA PATHIAN Â A HI	18
7. SERMON	
a) Tangphai Provisional Synod hawndaw in a um ta'i	22
8. KNP HUANG	31
9. KKP HUANG	33
10. SUNNA	39

Moderator : Rev. Kamkhotinthang Neihzial
 Secretaries : Rev. Thanglianlal (Sr.)
 : Rev. Andrew LR Khiangte (Jr.)
 Finance Officer : Rev. S. Khaikhawlam
 Statistician : Upa S. Thongzalal
 Executive Secretary : Rev. S. Lama Vaiphei
 Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Khristian Khanglai Pawl leh Kochuam Numei Pawl (Central, Bial, Branch) te nasepna a lawting jel theina ding in pauchap hitiu.
2. Kochuam Upa leh Tual Upa te'n Kochuam mite Taksa leh Thagau ah kiningting tak mai ah a puihuai jel theina ding un pauchap hitiu.
3. Missionary mun chuam chuam ah um te â ding in pauchap hitiu.
4. Gamsung buaina ziak ah panlatu pawl chuam chuam ah puitute â ding in pauchap hitiu.

NGÂILO LA HEM HUKDAMPA LA VANKHAWPI TUALNUAM CHU

Ralngama chun Lalpa Jesu kiang in dawtna mawl tak a la dawng ah, “*Ngâilo la hem Hukdampa, la vân khawpi tualnuam chu, bang ding ah gankuangah hung lum mai la hem*” ti in. Lalpa dawnhuna chu “*Aw ka ngai ka vân khawpi, maleh nang gitlo ziakin, lei thim ah vakvâi ka hi*” a ti a hi.

Vân khawpi tualnuam nusia ah, bawngin tawm tak hung tel ah, gan ankuang sung ah sial ah um in, musit leh engbawlna tincheng a thawkzaw nungin Kalvari ah khaikâng in a um hi. Zia zosia hi nang gitlo zia k a hi ti in i Lalpa Jesu chun ei hil uh a hi.

Lei leh van Lal Chapa hil hial in zia zosia chu a thawk ngai khawp ah i sukkhial uh chu bang pen a ta diam? Pathian thu sang ah a melmapa thu i awi zawk uh hi a hi. Eimau in i bawl uh soal chi chuam chuam, milak ah le gendaw ngam umlo khawp ah i zachakpi teu haw hi; Pathian thuawilo ga, gitlona ga te chu a hi. A bulpi chu gitlona/thuawilona kha a hi. Pu Thangkai leh Pu Lungpau te hunlai a khan thugen a thiam puau ah “*Pathian thu hi awi un*” ti bep a gen sek ui a tiu kha, gen hawi ma ma a hui. Pathian thu awi leu hen thil dang zosia hi bukim mai ding a hi.

Serafim sang tamtak te’n nisin a pâk chimlo uh Van Lal Chapa chu lei thimah albang a hung vaina hi ngaitua thak tia nang leh kei gitlo zia k ahia, tukum Good Friday a hin Lalpa ka gitlo tam dan, lui piaunel zat a hi, lungsiat in ei ngaidam inla, tuni kipat in la thu awi tang ka i ti nuam diam uh le?



Kochuam Huang

Kochuam Piting ah lânkai

Mata Pastor Bial sung ah S. Bualkawt Branch Church chu February 4, 2024 (Pathianni) in Rev. Thangneipau Vaiphei, Lamka South Presbytery Moderator puihuaina'n Kochuam piting ah lânkaina hun mat a hi. Zia hun a hin Kochuam Upa têlna le um in, Kochuam Upa pani a têldawk ua, Mata Bial Choir in le Pathian chawihawina La a sa thei ua, Pathianni nitak kikhawp in Executive Secretary, Rev. S. Lama Vaiphei in Pathian thugenna a nei hi.

Pastor Bial KNP Kikhawmpi

Gamsung buai ziak ah Pastor Bial khenkhat chun Bial KNP Kikhawmpi mang theilo in um maleh Bial tamzawte'n a ngaina gual hilo maleh Vaihawmna leh Kikhawpna ah matthei a hi.

KNP Vaihawm Kikhawp

KNP Vaihawm Kikhawp 9-veina chu March 2-3, 2024 sung in

New Lamka Pastor Bial zintunna New Lamka Kochuam Biak-In mun in Vaihawmna, Thuzil latna leh Rev. PB Zosaphara in thugenna nei in lawting tak in mat a hi.

Pathian Biak Kikhawp

Puihuaina Bu

“Pathian Biak Kikhawp Puihuaina Bu”, Kochuam Upa, Pastor/Minister, Pro. Pastor leh Kochuam tinte kiang ah (Kochuam copy) a thawn ah kihawm a hi zing lai in, Kochuam mi kua tawbang a dawi a um chun Tangphai Provisional Synod Office ah ₹ 200/- ah chawk zing thei a hi.

Khristian Labu (Tonic Solfa)

Revised & Enlarged

Kochuamte'n i ngaklel ma ma'u Khristian Labu (Tonic Solfa) Revised & Enlarged chu March 7, 2024 (Ningani) in Tangphai Provisional Synod Office in Rev. T. Zuanlal in Latna a nei hi. Labu hi Demy size (a pangai) ₹ 300/- leh Pocket size ₹ 200/- in Tangphai Provisional Synod Office ah chawk thei zing a hi.

“HIATPITU GINUM”

(Thupuan 1:5 & 2:10)

~ Rev Khuplemlal
i/c Leilon Pastor Bial

Thumapui: *Hiatpitu ginum* i ti hin, hilchian thei dan leh genchian thei dan chuamchuam um ngei in a. Pathian thu hiatte ginum tak ah mang, Pathian thu in a gen gual ah ginum takah hinkhua mang tile hin le kigen khial pua'n a. Tuhun ahin Pathian thu hiatpitu ginum ti a h'em, Lal Jesu thu hiatpitu ginum, ti lam kaw in gen ding ihi. I Bible i et chun Pathian thupiak phatak ah vawpdet ah, a thini tiang ua Pathian â ding ah hiatpitu ginum muthei ding a um a, Lal Jesu thupiak hiatpitu ginum ahi ziaak ua, vauna, enggawtna, tuak leh martyr huap ah hiatpitu ginum a um uh ahi ti imu thei a hi. Chuleh, Bible ah chuang chetlo, kochuam masate hun lai inle Lal Jesu thu hiatpitu ginum ahi ziaak ua martyr tuak le mi bang hem zat ala um a hi. Zia mite chun banggual tiang ah Pathian â ding ah hiatpitu ginum ala hiu em ti ala en ding i hiu.

1. Hananiah , Mishael leh Azariah : Daniel bung khatna i sim ahi chun Lengpa Nebukadnezar Inpi ah khawsa, Kaldai lekha leh pau zil ah um, kum thum a zilzaw phat ua leh Lengpa vaihawmna pansak hi ding Israel tangval pali imu thei a, ziate chu Leng In ah hotupa

chun a min ding uh le a phuak piak ngal a, amau chu Daniel (Belteshazzar), Hananiah (Sadrak) , Mishael (Meshak) leh Azariah (Abednego) te ahiu. Pilna leh hetthiamna lam ah a mau pali chu a tuk khat chale a um puau a, ziaziakchun, amau chu lengpa chun a vaihawmpi dingin a

kawidet ta a hi. Daniel bîk chu kilâkna leh manglam ah hiatthiamna nei chuam ahi zia in lengpa Kuras lal kum khatna tiangin, lal inpi ah chun a um den ta a hi.

Israel tangvalte, Babulon gam ah a um zing lai ua chun Lengpa Nebukadnezar chun milim lian tak siam in Dura phaizawl ah chun a kawi ta. Zia milim kisiam kawm masang ah chun Lengpa thupiak gual in gamsung ah mi zosia chun bawkkhup ah chibai a buk ding uh a hi. Kua tawbang bawkkhup ah holo taphawt chu meipi kuang sung ah selut hi ding a hi. Maleh, Israel tangval pathum Hananiah (Sadrak), Mishael (Meshak) leh Azariah (Abednego) te chun lengpa thu chu manglo in, Pathian thu hiatpitu ginum a hi zia un, zia lengpa milim siam ma chun a bawkkhup nuam talo uh a hi. Zia chu lengpa'n a hiat phat in a lungna mama a, hiti hin a gen a hi, "*La biak nawplo ua leh vang, meipi kuang sung ah kintak ah selut hi ding la hiu, ka khut a pat*

nanguh hukdawk thei ding pathian chu kua ahem? ati a hi.

Ziaphat a chun, Pathian thu hiatpitu ginum tangval pathumte chun, Pathian thu hiatpitu ginum ahi na'u "*Keima tilo Pathian dang him him la neilo diu a hi.... bang thil hi ziang leh le, a kibatpi milim la kisiam lo diu a hi, zia haw ang a chun bawkkhup kiu unla, a na'u le la seplo diu a hi* (Exod. 20:3-5) ti thu, Pathian thu a hiat ua khan ginum tak in a um tawp mai ua, zia gual a hin a dawnhu uh a hi, "*Aw Lengpa, a nâ kasep uh Pathian chun meipi kuang lak leh nangma khut ah kipat ei hukdawk thei a hi chun, ei hukdawk mai hen, a hinla, a chutilo tâk leh le, Aw Lengpa , La pathian nâ chu sem puang ka tiu in, la sana milim siam chule ho diaklo ding ka hiu ti he ta'n, ti'n a dawnhu tau a hi. Israel tangval pathumte gual a hin hiatpitu ginum i hi na emle? Amau dinmun gual ahin ding ta lehin bang gual in i dawnhu ta diam le?*

HINNA VÂK

2. Nungzuite leh Apostolte :

Nasepte bung lina i sim chun, Lal Jesu nungzuite lak ah pani Peter leh Johan in Lal Jesu chanchin, "*Chanchinpha*" a gen ziaak uh leh Jesu min a thu a gen ziaak ua, Thiampulalte, Temple hotute leh Sadukaite'n aman ua, a vau ua, Jesu min ah thugen talo ding leh, thuhil talo ding ah thu piak ahi thuu i muthei a hi. Thupiak khautak mai dawng ma leu, Peter leh Johan chun "*Ka thil muu leh hiat uh chu genlo thei kahi puau hi*" a tiu a hi (Nasepte 4:20). Zia bep chu le hilo in, Nungzuite'n "*Chanchinpha*" Lal Jesu chanchin kha Lal Jesu min in a gen zel ua, sukgentheina a hung um a, dodâltu a hung um zel a, khenkhatte chu mat in a um ua, Jesu min ah thu gentalo ding in, khautak ah vau in, thu a piau a hi. Maleh, zia hun a chun le, Peter leh Apostolte chun "*Mihing thuneina sang ah Pathian thu kamat zawk diu a hi*" (Nasepte 5:29) atiu a hi.

Vauna leh matna kâl ah le nungzuite'n "*Ka thil muu leh hiat uh chu genlo thei kahi puau hi*" atiu hin, Nungzuite leh Apsotlete kha Lal Jesu thu hiatpitu ginum ahi ziau a sulang a hi. Lal Jesu'n a kiang ua a gen "*Chiau inla, namtin lak ah mi nungzui in siam un la*"...*la kiang ua thu ka piak zosia hi zawm ding in zilsak un*" (Matthai 28:19-20) ti leh "*Khawvel zosia'n chiau inla, thilsiam zosia kiangin chanchinpha vagen un*" (Marka 16:15) ti kha hezing in, Lal Jesu thupiak hiatpitu ginum ahi ziau a sulang uh a hi.

Nungzui masate, a bik in Lal Jesu nungzuite khan, a thu hiat uh, Lal Jesu thuhiat pitu ahi nau kha ginum tak in a vawpdet ua, a hun uh a tawpni tiang in Lal Jesu thu hiatpitu ginum hi in, Thi tiangah ginum ah um in a martyr uh a hi. Lal Jesu thuhiatpitu ihi nau ahin bang tiang huam ah hiatpitu ginum i hiu em le? A nawpna leh limumna tiang bep ah hiatpitu ginum ihi em le?

3. Polycarp (69 – 155 AD) :

Polycarp hi gingtu masate lak ah mi ahia, *“Thi tiangah ginum in hung umta’n, tichun hinna lallukhuk hun pia ding kahi”* ti thu dawngtu *Smurna Kochuam* ah mi a hi. Lal Jesu thuihatpitu ginum tak a hi. Kochuam pate lak ah mi pani, Irenaeus leh Tertullian chun Polycarp hi Johan (Lal Jesu nungzuitu) nungzuitu hiin a gen uh a hi.

Polycarp hunlai ahin khristiante dodalna leh sukgentheina nasatak a um a, khristiante chu sukgentheina bep hilo in, sukgentheina ziak ah thina tuak hial le a um uh a hi. Tamtakte chu a martyr ua, zia martyrite lak ah chun Polycarp ngei hile a pang a hi.

Polycarp chu a matyr ding kuan a chun Rom sepia hotu chun, a mel a et ahi chun, a khut ah zia teksia kum 86 mi chu tha a hi mai ziang ding chu a lungsiat mama a, hiti hin Polycarp kiang in Sepai hotu chun a gen a *“Hepu, La Pathian hi phatsan in la, la gin la biak leh la zui Jesu hi*

Phatsan in la hung thadawk mai ding ka hi” ati lai in Polycarp chun *“Ka Pathian na hi kum 86 sung kala sem ta’n kalak ahin Ka Pathian hi a ginumlo kha ngailo ahi, Bang ziak in em ka Pathian leh ka hukdampa ka phatsan ding”* ati a hi.

Tichun mei in a hal ua, a kang lum thei talo, a thithei keilo phat a chun, cheicha in a sunlum tau a hi. Tichun Polycarp chun Pathian ah a ginumna, Pathian thuihatpitu ginum ahi zia chu a tak in a sulang a, a hinna hial le a chên a, martyr thi in a thi ta a hi. Thi tiang ah ginum in hung um ta’n ti thu dawngtu Polycarp chu thitiang in Lalpa thu hatpitu ginum in a pang a, hinna lallukhuk chang ngei in a. Polycarp gual ahin, lau umna leh thina ding mun ah le Jesu Khrista thuihatpitu ginum dinmun in i ding ngam na diam le?

Thukhakna :

Hananiah, Mishael leh Azariah-te chun mi gam ah kuama muphâklo mun in le, Pathian â ding ah hatpitu

HINNA VÂK

ginum ahi ziau a sulang ua, Haksatna leh thina lak ah le a Pathian un hukdawкло ding hileule, Pathian ah a ginnau ah khan ginum tak in thi huam in a pang ua, Nungzuite chu vauna leh sukgentheina kâl in Lal Jesu thu hiatpitu ginum tak in a pang ua, chuleh Polycarp chu Lal Jesu, a gin Pathian â ding ah hiatpitu ginum (*Martar huam*) ah a pang gual ahin, i gam in buaina a tuak zing lai a hin, i Pathian uh hin

ei hukdawк in ei hukdawкlo ding hilele, Israel tangval pathum-te, Lal Jesu nungzuite leh Polycarp te gual ah, Lalpa a ding ah **Hiatpitu ginum**, Khrista thu hiatpitu, thi tiang ah hiatpitu ginum in pang hi tiu. I Bible in ei gen gual in thi tiang ah i ginum uh chun hinna lallukhuk chang ding i hiu. I umnau, i sepna'u mun chiat un Jesu Khrista, Hiatpitu ginum hi gaw chiat hitiu.

-
- *Pathian hepina chu thil umthei a hi ti latsak ding hilo in, Pathian hepina chu muthei ah hung latsak ding in Jesu khawvel ah hung a hi zaw.* ~ Anon
 - *La chapa Thân thim ah nithum a zal nung in, Simhaini lungsiat-umpen chu Pathianni kipak-um pen la chansak tai.* ~ Max Lucado
 - *Thawkitni hi kum khat ah ni lopi pen a hi. Khristmas sang in a pha zaw, Pianchampfa phâk sang in a lul zaw.* ~ Ed Drew
 - *Kraws ah nang leh kei bat a ditna chun i gitlona'u sandup zosia tawh a silthiang hi. Thawkitna mangcha'n Jesu Khrista chun mihingte chanchin a hung zik danglam vek ta a hi.* ~ Francis Okumu
-

“KHANGLAITE: KOCHUAM LEH NAM KINEPNA”

~ Rev. Thangneipau Vaiphei
i/c Panglian Pastor Bial

Khristian Khanglai Pawl Thupi hi *“Thilpha hi dingah hukdam”* a hi, Thilpha ti hin tulai khawvel a hin thil chi chuam chuam te’n ei chup vel a, Khanglaite â din chiana ding leh pet mangna ding tamtak a um hi. Lampi dik hileh kilawm tak himaleh lampi dik hilote, lampi zang tak ah ngaithei himaleh lampi kawi hi a tam mama mai hi. Zia hin haksatna tamtak a siam a, eima dawidan leh phatna ding lam ah Pathian thu vak lak kâwi le a um thei hi. Zia lak a hin Pathian mattâk (Kochuam leh Nam Kinepna) hi di chun dawthei tak, thuakzo tak a i thawk chang le um sek in a. Khristian Khanglaite hi i pilvangu a pawimaw ten hi. I nasepnau a hin vangam a kawkw em? Pathian mattâk i hui em? tite hi i kidawt zing dingui hi a pawimaw hi. Belchian daww leh ettawn tâk, khawvel mite’n a ngaisan leh Pathian hepina hinkhua neitu, Pathian mattâk, Kochuam leh Nam kinepna khanglai hi hih tup chiat hitiu.

Mattâk Khanglai :

Khristian Khanglai Pawl hi mattâk Khanglai i hi dingui a hi. Um mai mai ding a hi puai. Mattâk Khanglai hi ding hin Qualification dang a um

chuam puai. KKP member-te hi i qualify vek ui ti hi i hiatu a pawimaw hi. KKP nasepna te, puitu chanvo-te hi kua hi ziang ta leu hinle i chang thei vek ui. Pathian in talent

HINNA VÂK

ei pe vek a hi. I lengua hin zia â ding ah chun i mattâk veku a hi. Abraham Lincoln chun, *“Mi kuanle bang nâ hiziang talehle phatakcha a sep thei ding phawt chun, hunpha piai tin uh, sep sak hitiu”* a ti’i. Zia thu a hin nasepna a hin kua hi ziang taleu hin belguat bîk a um chuam puau hen chanvo te hi i chang thei vek u hi. Chanvo pha tak takte, thiamlo ding a kingai mai te hi a pha puai. Mi’n theitawp a sua chun a hi thei zel sek hi. Pathian in zia ding ah chun a mite chu a guanggal zing sek a hi. Ziaziakchun, KKP member te hin i malam hun zel a hin mattâk Khanglai, phachuam leh lûlna nei Khanglai hi hih tup chiat hi tiu.

Kochuam a mattâk Khanglai :

KKP te hi Kochuam nasepna supiting tu ding ah pawl kiphut i hiu a. Kochuam a bâk pawimaw tak hi in, a khut leh keng i hiu. Kochuam chun mumal tak ah a chiatheina ding in KKP memberte chun Kochuam nungchang zil in

Kochuam ah nasepna to zel ding in a kisingsak di’u a hi. Zia gual sukpitin chu KKP nasepna le a hi. Kochuam hawina hi Khanglaite tawidan a pat thîl a hi sek hi. Kochuam kingakna leh Kochuam in a mattâk KKP member i hiu hih a pawimaw takzet hi. Kochuam leh KKP-te hin Social-work nasepnate leh programme dang dang a nei sek hi. Zia hun a hin Khanglaite’n KKP lam bep ngai pawimaw a, Kochuam programme dang dang leh social-work te ngai pawimaw zolo i hiu chun KKP i hi ziaku kihechian nailo hiding i hiu.

Branch leh Group thil ah phatchuam i ngai gual un Kochuam ah hinle phatchuam i ngai ding uh a hi. KKP te hin Kochuam ah mattâk Khanglai i hiu ti hi latsak zel theina ding a chun Kochuam kikhawpna leh hun guatte hi i ngai pawimaw dingu a hi. KKP member hi zing ziangte, KKP member ah thatnawp bep hin tawp ziang puai tiu. Ei enkawltu leh ei jêm hawitu Kochuam mattâk hi ding ah bêl sêktu’n ei sêk

lai i hui ti hi hia in Kochuam mattâk leh khut-leh-keng hiding in theitawp sua thak zel hitiu.

Nam ah mattâk Khanglai :

Khanglaite hi Kochuam a le ginum tak ah pan i lak gual un nam leh khawtâng haw inle theitawp sua'n i pan diu a hi. Kochuam leh Nam hi kikhen thei a hi puai. Malai a chun Kochuam leh YVA kikal ah awng liantak um gual in a la ngai ua. Himaleh, a hina tak hechianta chun Kochuam leh YVA kizawpmatna thûk zia leh nasepkhawm a pawimaw dan hi a hedawk zel ua. KKP memberte hile i nam â ding ah bang phatchuamna i neiu em? I nam in mattâk ah ei ngai in ei guat sek nau em? Khawtâng nasepnate a hin i sep thei tiang un i pan sek diu hi zaw lo a hem? Ki thutak sak mama, ki thagau mi sak mama, mi nui hun a le nui nuamlo khawpa ki za um sak haw hi a phachuam pua hen, a nunglam un midangte gen a law sek ui.

Khanglaite hi Kochuam ah i phatchuam gual mau in khawtâng leh nam â ding inle i phatchuam diu a hi. I namsung leh i khawtâng khantona ding in Khanglaite ma hi i pawimawu hi. "KKP member te hin nam leh khawtâng ngaisaklo a, Khanglai nasepna lam bep a thanuam ui," i la ti sek teu haw hi haisan ta hitin u. Tuhin chu KKP memberte hin Khawtâng leh Nam a ding in mi mattâk leh guattâk i hui ti hi latsak zaw tai tiu. Kochuam dangte leh Kochuam ah kibual ngailote â ding inle ettawntâk din kisiam thak hi tin u. Amaw haw sang sang a le taima zaw leh semtam zaw, lungthim phazaw leh ngaituana chîm zaw nei ding in tup chiat hitiu.

Khanglaite hin Biak In ah nasep pha hi huntawk sa jianglo in, Khawtâng tiang in nasep pha hi sem jel ding in i kisak diu a hi zawi. Biak In hi Pathian i biakna mun uh, a thuchate i ngaithak ua, Ama pâk leh chawihawina mun uh a hi. Nasep pha i sepna

HINNA VÂK

mun diu chu Biak In bep hilo in a pawlam, khawtâng kivaihawna te, insak-inthang leh midangte kiang hi zaw ding a hi. John Calvin in le “Nasep pha hi Pathian biakna a hi” tî’n a la gen hi. Ziaziakchun, Khristian Khanglaite hin KKP nasepna a zeitak leh thiamtak bep a sep di hi zaw loin, khawtâng nasepna ah te, gam kivaihawmna ah te leh pawl chuam chuam ah nasepna ah te hinle mattâk leh guattâk i hiu diu a hi. Khawtâng in le bangma a ngailo leh mattâk ah a ngailo chu Kochuam ah le mat thei tak tak a hi diak puau. Ziaziakchun, Nam leh Khawtâng a ding ah mattâk leh guattâk Khanglai hi tup chiat hitiu.

Thukhâkna :

Khanglaite hin Kochuam leh i Nam sungua hin mawpuakna liantak i nei ui, George Washington chun *“Khristian Khanglaite khut ah hin i*

Nam dinmun a um hi” a la ti a hi. Khanglaite hi nu leh pa kinepna i hiu ti hi hemil pua hi tiu, Khanglai i hi lai ua hin Kochuam leh khawtâng ah kibuallo a, bangma le i kizillo ua a hi chun, i masangu hi kungbul bang mai ding a hi; nu leh pa dinmun i hung lua thei tiang un vang khangthakte puihuai didan kithiam zo puan a. Ziaziakchun, KKP member te hin i chung ua mawpuakna umte hi i tit leh i titlonauteu suanlam ah manglo in taima tak in sem zel hitin u. I thiamna te’u midang zilti thei ding leh i thiamlonate’u haw midang ah kipat kizilto zel a, Kochuam leh Khawtâng in mawpuakna chuam chuam muangtak ah i ko ua a ngatteu hi sem piting thei din panla chiat hitiu. Pathian hatna suang in, i malam hun chiat ua hin mattâk Khanglai, mi phachuam leh lûlna nei Khanglai hi hih tup chiat hi tiu.

“BIBLE AH KILE KIT IN”

~ Rev. Summinlian Vaiphei
i/c Sugnu Pastor Bial

Thumapui: Tulai ah hin Khristian sakhua ah kiak niamna lian tak mai khawvel ahin a tung zing hi. Mitam tak ngaidan ah, a kiak niamna ziak chu Hindute ziak, Muslimte ziak i ti mai thei ua, himaleh, Khristian sakhua kiak niamna ziak diktak chu Khristiante ziak a hi. Khristian tam takte hin Bible thu tawh kituak ah hinkhua i mang ta puau hi. Khristian kiti ngal Bible in hindan ding ah ei zilsak gual mawng mawng ah hinkhua mang tawm talua ta. Pathianni ah Biakin sung bep ah Khristian hina kilangzo ham ham ta. Biakin sung ah sakhua mi tak gual in kilang ma leu hin kalkhat sung ah i hinkhua mat dan un thagau lam An duchâk ding bangma mu ding umtalo, Khristian tamtakte hinkhua hi chu chawpawl hinkhua hita, Thankik Khristian a hun leh a mun dung zui ah kikhel zing thei i hi tau. Khristian sakhua a hung paklûn thak kit na ding in Bible thudik ah kile kit i pawimaw tak zet ui, Bible thudik ah i kile kit na diu point pawimaw diak pathum zil khawm hitu.

Kihepina [Mat 22:39]: Dân lam ah mithiam hotu khat in Jesu kiang ah thupiak lak ah lopi pengenchian piak ding ah a phût lai in Jesu’n, *Nangma la kihepi gual in la vengte la hepi ding a hi*, ti’n a dawnhu hi. Lal Jesu zilsakna ahin ‘*hepina’n*’ mun a chang sang ma ma hi. Zia chu ahi zinglai in a zilsakte lak in hepina hin mun a chang tawm ma ma hi. Dr Tom Davis in hepina (love) ti thumal hi Bible in 714 vei a kigen hi a ti. Zia gual ah hepina’n Bible sung lua

HINNA VÂK

maleh, ei uh Khristian te hi Bible thu gen zui ah ki ngai, himaleh, zuilo i tam talua tau hi. Mani masialna'n mun a chan san dan chu, Kei ka hin phawt nâk leh midang chu thivek leule khawk salo. Kei ka khawsak thei nâk leh midangte chu a suak suak leu khawk sa talo, duâmna leh Pathian ngaisaklo na'n lungthim luadim, Pathian Thagau Thiangtho in mun chang talo. In ki nai deu deu lungthim kigamla deu deu ta.

Pathian thu thiam tam deu deu, Pathian thu mang tawm deu deu, Bible degree hawi tak tak nei kitam deu deu, Bible simsuak bep hilo ah ziak suak kitam deu deu, Bible thu'n i hinkhuau ah mun chang tawm deu deu. Bible hi simding, zilding leh ngaitua ding, zia ban ah chu eima hinkhua â ding ah kilak lut ding a hi. Lal Jesu'n, *Pathian Lekhabu sung ah kumtuang hinna um ah la het ziak un, gunchu tak in la sim sek ui;...Himaleh, hinna la neina*

ding un ka kiang in la hung nuam puau hi, ati a hi (Joh 5:39-40). Lal Jesu thugen hi tulai i hindan uh tawh kituak ma ma a hi. Bible hi sepna muna ding a h'em, foreign passport mu bailam na ding a h'em, kicheina ding ah sim ding hilo, Khristian hindan pha neina ding leh kumtuang hinna neina ding ah sim ding a hi. Zia hindan pha lak ah chun hepina hi i mihing hinpite tawh i kâl ua hin ngai pawimaw in tung ding thak kit hitiu.

Van ah go khawl [Mat 6:19-21]: Khawvel hi kumtuang gam a hilo ziak in Lal Jesu'n zia lei chung ah hin i go uh khawllo ding in ei thuhil a hi. Mihausa pen in a hausakna a kumtuangmundingah pawlut theilo ding, mipil leh mithiam ten a pilna leh a thiamna lutpi diaklo ding ti chu i hiatsau a hi. Himaleh, Kumtuang go tinglo ding Pilna leh thiamna hawl ah i buai dan teu hi maksak hial khop ding in aum hi. I cha leh nauteu khawvel

pilna leh thiamna a nei theina ding i buai pi gual ua hin, leh khawvel go ding khawl ah i buai gual ua hin i kumtuang go diu khawl in buai leu hin Pathian bang gual bep in i chung un a lungdam diam? Bang gual ah In hawi leh lopi, gam lian leh go lul khawvel a hin nei maleh chun la nutsia ni hung tung ngei ding a hi!

Sumthianglo ah Inchen siamte'n zia thu hi he zing hitiu: *Thilphalo in a sukkhaklo ding ah buk sang tak ah sia ah, a insung a ding ah lawkna diklo la khawmte chung chu a gik hi... mitamtakte hi mangthai ah, la insung a ding ah mualphona siam la hin, nangma siatna ding kibawl la hi. La bang ah suangte nasan chu hung kikodok in, Inthing lak ah inkam ten hun dawnhu in nau, (Hab 2:9-11).* Zia Bible thu hin sum negu ah inchen siamte a suasal hi, Tuni ah nangma chantum ding hilo sum ah inchen siam la hi chun zia Pathian thu hi nang â ding ah thupiak a hi.

Tuni ah, a bawlthei kisa te'n la insak nau cheklei/suang/thing leh cement ah te khan gentheite chantum ding sum bangzat a pang kha diam? La gari chawkna ah khan nang a ding hilo sum bangzat a pang diam? La insung van la chawkna ah khan gamsung ah development fund ding bang zat a pang diam? Tuhun ah la In leh go hawkha kiko dawk thei hileu keile development fund ding zia hin ka um ei ti ding ahiu. Ziaziak ah chun tuni ah la go khawlkhawm kha go thiangtho ahi na em? Bible thu ah ki enchian in.

A neitu diktak bawn kuama kiumlo, gam kichu in khawvel ah hin kibuai buai hitiu in, gim leh chawl tak in Pathian thu le buai pi manlo tawp in lei thil hi buai pi hitiu in (Tgt. 4:8) a tawpna'n khawvel gam hi nusia hitiu in, Lalpa Jesu thugen, *Mingawlpa tuzan la hinna hun lakpiak intiu in la thil guanggalte chu kua a chang ta diam (Lk 12:13-21).* ati kha hung gui tung

HINNA VÂK

ding a hi. Zia hun tak chuleh khawvel gam bep ah go a la buaipi kha lahi ah kumtuang a ding, ah go khawl khalo lak ah la pan khak leh vang la kisikna sâng ding a hi. Thil zosia a kikhelma'n kumtuang â ding go khawl kha nailo lahi leh go khawl pan ta ding in Pathian thu'n ei hil hi.

Diktatna/Ginumna: Bible in, *mihing ah dawi um pen chu diktatna a hi, chatgana chu lepchiana sang in a pha zawi a ti a hi* (Tpl. 19:22). Himaleh, Khristian kahi tite lak ahin midiktat mu ding a vâng ma ma hi. I diktatlo na' u kilatna langsal pen khat chu paisa thu ahin a hi. I gam sung ua development sum hunglut sun sun i mat dan te' u ahin a muthei hi. Insakna ding ah sum hung insalo ah thil dang chaw daih, Jobcard sum a hiding gual ah manglo.... a dang dang tampi gen ding um in a. I gamsung uh pua phatna ding ah paisate hi diktat tak in kimang leh tu sang ah hin vang i khua leh veng uh hi

nuam zaw ma ma ding a hi.

Tuchung buaina zia ah In leh lo kihal sia tamtak hi sum thiangtholo ah ki siam dawk hi ngei ding a hi. Diklo tak ah nei leh go la lakkhawm kha a suksiat dan leh a sukmanthai ding dan Lalpa'n hetalua a hi. Mizoram Chief Minister Pu Lalduhoma in IPS Officer kala hita, MLA leh MP kala hi ta, himaleh tuni chan hin ka In ziang le duthusam in kasa zo thei naipuati. Agenbe zel na ah chun MLA term khat hung pua in hawitak hung sa pai te khu negu ti na a hi. Khristian khat ah i kingai ah, Lal Jesu nungzuitu kahi i ti nak ahi leh chu sum leh pai thu ah diktat ding a hi. Diktatna/Ginumna hi Bible in a chawisang ma ma hi (Sam 145:13; Thup 2:8; 3:3-4).

I Ginum na dinguh khat kit chu ahi leh sepna mun ah ginum di, Bialtu Pastor khat hi ngal a sepna mun sang ah Lamka lam ah um mun zaw. Pro Pastor kahi lai ah ka Pastor zuipa'n ei hil dan ah chun

zankhat ziang le i bialsung i nusia ding leh Synod Office ah phalna lâk ngai ahi aw ati. Pastorte lak ah i bial sung Sakhi gam fan ah fang, pay mutheina ding ham ham ah sem i um khau em? Lal Jesu'n, Belampu pha chun a belamte â ding in a hinna a piai ati gual in kochuam i et kawlte a ding ah ginum tak ah pan i lak ngai a hi. Ka bial etkawl hi ka um sung in bang gual ah thagau leh taksa lam ah khantona ka tut man diam ti zing ding a hi.

Chun, Pastor chep leh muam bawl ki um, Kum 2011 ah kipat pastor kila thakte la interview nau ah khan chep leh muam la bawl em ti question hun dawng ngei ding ahiu a, ka bawl hi tile chun Pastor ding ah hun la keilo ding ahiu. Synod Office ah kipat inle Pastorte hi chep leh muam lak ah kikawi thaingtho ding ah khiatsak i hi zing lai ua, bawl tei tei ki um zia hile ginumlo na chi khat a hi. Chep leh muam bawl pastorte hi Synod

Pastor pakhat chun third class pastor ati a hi. Belampu khat eima hinkhua ah bawl ginumna neilo hin bangtin ginumna thu i belamte i zilsak thei diam?

Manipur ah semtu tamtak government teacher, medical staff leh a dang dang sepna mun ah umlo, thasang ah mi sepsak zia chu kuate... kochuam ah puitu lubawk tak tak tampi um, Pastor bial khat ah ka umna chun Government teacher pani chun kei un hung sem kile ung le law la tho ding kahiu ati mai ui. Zia mite chu Khristian kiti gel gel ahiu. Khawpi lian lam ah um khenkhat Manipur Government nuai ah sepna nei khawpi lian lam ah le private vel ah sepna nei um nalai. Damlona ziak le hisamlo semtu khat midang thasang ah sepsak kha banggual in thiam kichan le chunle la thasang ah mi la sepsak kha dân tawh kituaklo ahi ti hezing in. La sepna mun ah um peilo la hi leh ki resign/voluntary

HINNA VÂK

pension la mai in. Thingtang gam nusia ah khawpi lam i hiti kidel huanna ziak pakhat chu thingtang ah damdawi lam ah ki etkawlna leh zilna hawilou ziak a hi. Thingtang ah goverment school um haw a hi ding bangtak in etkawlna hi henla, school ah semte'n phatak in semu henla medical department lam le Sub-centre haw bek function leh tusang in thingtang ah le mi kicheng tamzaw ngei ding a hi. Tuni'n nang leh nang thiam kichan kawm kawm in la sepna mun ah umlo ah midang sepsak ahi lo leh semkeilo ah thasin ah paisa seplo thalaw la zing la hi chun, la ginumlo ga hung luak to zel ding la hi. Zia ban ah chun a tawp na kei in, Pathian vaihawmna ma ah nikhat tei chu ding chiat ding i hiu a *suakpha leh ginum* la bawl phai tite lak ah i pang diam? ahilo leh Pathian min ah thugen zing, pauchap zing, sawmakhat pezing, kikhawm zing, Sunday School zilsaktu ah pang, kochuam

ah nasepna ah taima ma ma. Jesu thisan ah unau dawitak, Bible in maw, *Lalpa Lalpa ei ti taphawt vangam ah lut ding ahi ziang puau* ati a hi. Khristian phatak ah kingai zing kha *nang uh thil gilo hite haw ka hun hekha puai, ka kiang ah kipat chia mang un* a ti lak ah i pang diam? Ei un Pathian he ma ma, himaleh, Pathian melhiat i hilo khak diu thil tizat um pen khat a hi.

Thukhakna: Thupuan 3:16 ah *Sat la sa vanglaklo, vot la vot vanglaklo*, ti thu hi ki etchian na diu in mang hi tiu, Khristian khawvel tawh kikhenna mawng mawng neilo kitam ta, kochuam sung ahin original khristian hilo, duplicate Khristian i tam talua tau hi. Ziakiak chun, khawi ah kipat akha ala puk lahi em ti ki ngaitua inla, la lung hun hei kit in ti hi Pathian in a thudik ah kile kit na ding ah kona aw a hi.

Pathian in athu malsawm ta hen.

“GAM LEH GUA KITI HI LALPA PATHIAN Â A HI”

~ *Pu Ginlalthuam*
Mualngat

Meitei gâl leh tual, thagiat val ving veng phutlo, halo in ei hun luankhum ziang tamaleh gam leh nam, khoa leh tui damna ding in i Lalpa Pathian, i kiangun ei umpizing hi. Vên ah um Hatchungnung, Lalpa Pathian in i gitlonate’u ei ngaidam ta, i chung ua a zangaihate a latsak zinglai cha hin, Ama kianglam in i nampi lawng uh tawl in a mipite hi Ama, Lalpa kianglam ah kile kit hitiu. Muantâk, Lalpa Pathian i nei uh a hi.

Tulai khawvel thuthangte hiatna ding ah news, social media et ah buai leh lungkham sang in, kisik ah Lalpa Pathian kiang lam zuan in lunggil tak in pauchap hitiu.

Gâl leh tual i tuak phut tâk ziaak un, Lalpa Pathian ah pat i mamawu um ngei ding in ka gingcha, zia chu :

1. I nam min uh lam in khutzak pum’in i pauchap diu a hi.
2. Khawpi lian hi’n, khawneu cha chate chu geldawk in, taksa leh thagau ah siamphat, chuleh Lalpa Pathian hatna suang in,

kisik in Hatchungnung Lalpa kengbul ngei in i pauchap ding uh a hi.

3. I thingtâng khoa leh tui a dam nalai sia zâmsan/pêmsan sanlo in, siam piti’n/sukpiti’n ding zawk guachiat hitiu.
4. I khoa leh tui, i In i lou, i gam i guate, gâlthe khut ah tuchan ah suksiat ah umlote sia bek cha hi sukchimit a hilona ding in, i Lalpa Pathian kiang in mitthi tawl pum in pauchap hitiu.
5. Sakhua lam hotute, khawsung vaihawmtute,

HINNA VÂK

nam puitute, politics puitute, sawlkâl nasepte, zillaite, nam sepaite leh volunteers (*khua leh tui vengtute*) zosia a ding in Pathian kiang ah lunggil tak in dawtpi in pauchap zing hitiu.

6. Nampi kisîk ah “Pathian buan ah pauchapna” tî’a, sakhawlam i hotute’n eila guan piak tâk uh khâ; sutzawp tup zel thei hile maw..!

7. Lalpa Pathian chu nam ah nei ngei ngei ding guachiat hitiu. Chuleh kipumkhatna dawmsang zing hitiu aw.

8. Sakhua lam kivaipuakna bep hilo, taksa kivaipuakna na tiang in i unau Mizoram leh Chin Hills tawh i kipumkhat zawk diakna ding kisiam thei henla, greater Mizoram puanlap kikhaisang maileh maw..!

Gâl a pat i damna ding un!

Zia a nuai ah Bible changte hi vak tiam/sim suk tiam hitiu:

“Israel chate chu a saltânnau ah chun a thûm un, a kap tau a. A saltânnau ah a kê thawmteu chu Pathian kiang a tung ta’n”

Pawtdawna thu 2:23

“Samuel in Lalpa kiang in Israelte â ding in a dawt piak ta’n; chuleh, Lalpa’n a lawtin sak tai” 1 Samuel 7:9

“Zia tak ah chun David in Lalpa hona ding in mâichâm a siam ah, hâlmang thilpiak leh kichamna thilpiak a lân tai. Tichun, Lalpa’n gamsung â ding ah a dawtna chu a dawnhu a, Israelte lak ah natpi chu a ladawk tai” 2 Samuel 24:25

“Aw, Zion chanu, la lunggil tak in Lalpa ko inla ! A sîn a jan in hawktui luang gual in, la mitthitui uh luangta hen! Chawlnga kiu inla, la mit le chawldam tik um ki’hen! Jankhang lai leh janvên lim ah kipat in thodawk unla, kap tau in! Lalpa ang ah la lungthim uh, tui gual in luan dawsak un! Kawtzing kil tin ah gilkiat ah basam la chateu hinna ding in, la khut uh a chung un jak in” Kâ Late 2:18 &19

“Kawlkawdong tiang ah thejak ah um hiziangleu chinle, Lalpa la Pathian un, hun puikhawm kit tho tho ding a hi” Dan Lekhabu 30:4

“La mau ah chun hinna leh thi’na, maljawlna leh hânsia lawna ka kawi hi. Chutichun, nangmau leh la suanteu la hintheina ding un hinna chu têt tau in” Dan Lekhabu 30:19

“Linlîng huaisia takte hung lîng intin, mun chuam chuam ah kialte tung intin, huipi hung leng intin, van ah kipat thil lau umte leh teptena nasa takte hung um in a” Luka 21:11

I Lalpa Jesu Khrista’n, a mi thiangthote pui ah a nivei hungna ding ah thilmak tamtak (signs) i mu tawh kitawn in, kisazosa i um theina ding un, Pathian zangaina leh Thagau Thiangtho chu kappum in dawn hitiu.

“Van ka hun khâkbit ah gawtui a hung umlo hun a hem, a gam nezo ding ah khaubepite thu ka hun piak a hem, ka mipite lak ah hipi ka hun lênsak phat leh, ka min pu ka mipite a hung kingaitawm ua, a hung pauchap ua, ka mêl a hun hawl ua, a nun siatnau lampi a hun kiheisan phat ua leh, van ah kipat hun ngaitha’ng ka tin, a gitlonateu ngaidam in, a gam uh hidam kit ding ka hi” 2 Khangthu 20

7:13&14

I gam leh i namu hi a dam ti thei ahi tapuai, u leh naute haw, a la ngaitua him him tia, tuchung ah i gâl tuak uh hi khang tamtak ala chiata, Pu leh pate’n ala tuak uh Pawi/Lai gâl huipi kha tawh banggual tiang in a kikhia diam? Hun nunung lam ahi tâk ziak in, “Pathian in namkhat chung ah vai a hawm piak nuam phat leh hotu gilo a pia sek a hi”. ti’in, John Calvin in ala gen hi. Zia thu hi ngaitua kham tak a ting a hi.

“La Pathian tuak ding in kisazo ta’n “ Amos 4:12(b)

Tulai khawvel thusuak/ lasuakte i ngaitua phat takleh, mihiamte gitlona, sualna ziak in Lalpa Pathian a lungdam talo a hi. Thîkthusia, Hatchungnung, Pathian lungnatna hi a pel thei ding mihiamte ki umlo a hi, a lau um talua a hi, ka mihiam chankhawmpite, Lalpa Pathian hi bel tak tak in bel zaw mai hitiu e.

I khua leh tui, i gam leh nam, taksa leh thagau ah i damna ding un, Lalpa Pathian i lunggil tak un ko hitiu in a thupiakte zui ham ham gua in, mitthitawl pum in pauchap zing hitiu aw!

HINNA VÂK

Kei uh, Mualngat khua (frontline) himaleh, Lalpa Pathian venbitna leh nangmau ei pauchappina zal in khua leh tui vengbit zing thei nalai in ka khawsathei liai liai uh a hi. *“Pathian chu ka taksang ui” (In God we Trust)* ti tawh *“Thamuang tak in um in, La Gam lahung tung tai” (Be at Peace, you have reached your Land)* chuleh thil pani, gâl ei vengpi ding ah hungte zosia kala muak(welcome) nau chu:

1. Khamnathei kisum ding, chuleh
2. Lungnat kisum tinten ah gâl vengtu/khua vengtu hi guat ding ti hi Mualngat khua'n, tuchung gâl i dona'u ah thupi in kamang uh a hi.

Chun, kikaptuana (firing) ka tuak mun ten vang un, Lalpa Pathian ei umpina leh ei venbitna zal in tuni chan in luvawm mansua hial vang ka umsam puau hi. Lalpa chu pak in umzing ta hen.

Tuchung gaal ziak ah ka phatchuampite:

1. Gâlvan hawipen leh thupi pen, Pathian thû nasa tak

ah ka dawn dan teu.

2. Pathian hepina, lungsiatna leh venbitna giltak ka dawn dan teu.
3. Lungkham ziak ah dipchung ah hatla zing ki himaleh, taigil ah hatlak dan ding ka dawn dan teu.
4. I genthei, i haksat, i lungkham leh i beidawnna tawpkhawkte hi Lalpa Pathian ei selgukna khat ahi thei hi.
5. La lungsiatna'u nasa tak, thilpiak ah-te ka dawng zing un, lei pauchappi na te'u ka dawng nasa khawp mai ui. Ka kipak takzet ui aw.

Zia te zosia ziak in Lalpa Pathian chu chawihawi in umzing taken. Simtute zosia'n, ei hung pauchappi zel un aw !

Awle, a tawp na ding in, i Lalpa Pathian hepina, i Lalpa Jesu Khrista lungsiatna, leh Thagau Thiangtho kithuapina chuleh venbit nate, i leng ua chung in tu leh kumtuang tiang in um zing ta hen. Halelluijah! Amen.

“TÂNGPHAI PROVISIONAL SYNOD HAWNDAW IN A UM TAI”

~ Rev. Thanglianlal
Secretary (Sr.), TPCS

Manipur Area Kochuam masawna kipak um tak ei musak a, hun haksa leh hun kipak um ah ei pui a, a malzawlna simsleno eidawnsaktu leh Provisional Synod dinmun tiang ei dawmsangtu i Pa’u Pathian chung in kipakthu i gen masa a hi. Provisional Synod dinmun i tun theina ding ah ei enkawl piting ah eila kaihuaitu Mizoram Synod chung inle kipakthu i gen bawk hi. *Pathian in Tângphai Synod hi a lopina ding in mang zing henlah! ma’ sawn pek henlah! Tâng leh Phâi gam zosia kiang ah malsawmna tuntu hisak zêlta hen, Amen.*

Tângphai Synod (*Tumasang ah Manipur Area kiti*) Kochuam hung kipat dan leh Synod i mu tiang dinmun a tângpi bep vak tâklang hiti’u.

Manipur Area (MA) hung kipat dan:

Manipur Area Kochuam chanchin hi ngainawp um tak ahi a ti thei hi. A ziak bulpi penlê, Vaiphei Nampi kipumkhatna dingah panlâkna gasua a tilo theilo a

hi. Khenkhat a kihûkpi chuam deu sek i um a, hetthiam a um ma ma tho hi. Ahinla, Manipur Area/Tângphai Synod hi a neitu bîk a um pua, Kochuam mi zosia â vek a hia, tunung ah le zia hi hiatmillo ding leh i chiapi zêl dingu hi leh ti a dawm um hi.

Mizoram Synod ah i lût ua kipat *kum 20* a vâlto ving veng ta, piting khat kum zat i phato ta a hi. Pathian lungsiatna zâl

HINNA VÂK

in Kochuam inle ma a sawn zinga, mani kito dela, eima kêngah ding thei dinmun i tun theiu hi a kipak um takzet a, thilmak le a ting thei hial hi. Kum 1991-92 vêl a khan *Evan. Zonunsanga* in Ngûn gâl gamah unaute kiangah Pathian thu a genna phawtin, “*Vaipheite’n, La khanto nawp ua leh Mizoram Synod kochuam zawp un,*” ti’n a dawisak thu a gen sek hi. 1995 kum in Nam kikâla buaina a hung pawt ziak in, Chenna khua leh Biak-In tamtak hâlsiat in ala um a, Nam dangte lak ah Vaiphei namte hi a thuak nasa pen in a pang a, thina tuak tam penle a hi hial hi.

1997 kum a khan buaina a hung kiveng phâtin tamtak chun khawlui lam ma bêl kit in Kochuam a hung din thak ua bul a hung pan thaku a hi. Tu dinmun a pat hun chiasate i vak nungthil kit chun manglam a bang hial a, Pathian mapuina i chang nasa ma ma’u ti i mu thei a, La phuaktu khatin “*Ei un*

vangsiatna i guatu Pathian malsawmna a hi” ala ti gual in, Buaina leh haksatna i tuak te’u mang in Lalpa’n eila kantha kit hi. Ei uh Manipur South District ah Khristian masa pen ah tepte a umte nasa tak a i chausiat tâk nungun Lalpa’n tundin thak kit a nuam hi ngei ding ginchat a um a, Hun sawt ah kipat Kochuam Pâwl chuam chuam in i la kikhen thângua, Politics leh Sum leh pai lam in i keniam ma mau a, a hun tak in Lalpa’n ei khatlawdaw sak kit a, tichun, Kochuam leh Nam ah kipumkhat ûtna liantak i hung nei thak kit ua, tichun 2000 kum in, Vaiphei National Organisation (VNO tuhin VPC kiti ta) Ex-President Pu S. Nengdolian (L) malatna in VNO leh Kochuam Pawl chuam chuamte kihokhawm in kipumkhatna ding a malâkna chu a hung kipanta a hi.

Kumkhat hial i buaipei nunguleh haksatna tamtak in eila bâwm ziang maleh a tawp in i lawting theita khawngua,

Dt. 16th December, 2001

Ni in Mizoram Synod chu Merger i la bawl tau hi. Rev S. Lalkhuma, Mizoram Synod Moderator in ei lâwmlut a, zia Ni hiatmil tâklo ding a hin mipi tamtak a ki chia khawm a, *“Pathian Thil Rel Dan hi A Va Mak em!”* KLB. No. 16. ti Lâ mipisakkhawm chun lungthim a khawi ma ma hi . Zia hun a hin, (L) Rev P. Kapa Vaiphei in Kochuam Pawl chuam chuamte thasângin *“Vaiphei Kochuamte kizawttua dan”* ti thupi simdawk in report a pia, Kochuam Pawl tin a pat palai 2 (pani) chiat dinsak a hui a, Mizoram Synod lam a pat Lawi upa mi 18 hial le a hung pang thei u’i.

Mizoram Synod ah Lawplut Kochuam Pawl te :

Mizoram Synod zawp ding thu ahin Vaiphei Kochuam Pawl zosia pan chiat ding ti himaleh Pawl 6-te chun kithugual tak in pan a hunglau’á, a tîlin VNO malatna nuai in Vaiphei Denominational Study

Sub-Committee (VDSSC) ti siamdaw a hia, himaleh VNO President leh General Secretary-te hêksiat ah a um ziakun a thasâng dingun Rev Mangkhosei Baite leh (L) Rev P. Kapa Vaiphei teni guat daw a la hui. Mizoram Synod tawh kihona masa pen chu tarik 22nd February, 2000 ni ah nei pat hia, zia zawnung a hin VNO leh Kochuam Pawl chuam chuamte kihona sutzawpto zêl a hitai. Dt. October 10th-12th , 2000 in Kochuam palai mi 8-te chu Aizawl ah va chia in Synod-te tawh a hang kiho kit ua, mabân chu Kochuam Pawl tin te’n mani Kochuam khawmpi chiat ah thupûkna lâk fel ding ti a hitai.

Zia hi bawzui chiat a hita, da-umtak in Kochuam lianpen EOC sung a hung buai a, Kochuam Pawl 5 dangte ahiuleh buaina umlo in thupûkna ahun lafel theita’ua, tichun, lawplutna ding guatfel ngal a hia, a mun Kangvai khua a mat ding ti himaleh a nuamlo te’n ei chawbuai ziakun Manipur Synod

HINNA VÂK

Compound, I.B.Road lam zawk a kitûpzaw leh lawting zaw'n mat a hita'i. Kochuam pawl zia huna lawplutte chu a hiu leh - *“Evangelical Church of Manipur [ECM], Revival Church of God [RCG], Church of God-Full Gospel [FG], Independent Church of Manipur [ICM], Evangelical Partnership for Christ [EPCC]* te sia a hiu. EOC Kochuam bîk hi Partnership guala sêmkhawm ding in lawplutna a chun a pansak tho ua, Pawl 5 lutthengte sia chu Joint District Manipur Area ti minpu in Synod in etkawlna chu bul a hung panta a hi.

Joint District hawna:

Manipur Area enkawl ding in Administrative Secretary masa pen Rev Lalramliana Pachuau chu Dt. 11th January, 2002 ni'n Lamka a hung tung hi. Manipur Area Office ding in Manipur Synod Office building I.B. Road ah Room kitiak deu pakhat mat a hia, Manipur Area Committee (MA) le siam daw pai ngâl a hita, Committee masa pen ah

chun MA Office ah sêm ding mi 4 lâk ngâl a hi. Zia kum ma-ma hin Manipur Area Joint District meeting hawndawna Dt. 7th July, 2002 ni'n Synod Moderator Rev S. Lalkhuma in a nei ngâla, Joint District a hin Pastor Bial 14 a um hi. Joint District Kikhawmpi masa pên le zia kum bawk a hin Dt. 10th - 13th October, 2002 sung ah mat ala hi. Pathian mapuina zâl in Kochuam in awl-awl ma-asawnto zêl a, Khanglai leh Numei Pawl le a hung kiphu daw sau sau tâk ziak in 2005 kumin Central PYF leh Central PWF te hi dindaw pat a hung hita a hi.

Kochuam kibulpat tîl lai vêl a hin, mumal tak in kochuam a chia ziang thei nai pua, kivaipuakna lam ah chualchûm ma ma nalai a, Seminar leh trainingte nei in kiziltina hattak in a kineito zing a, Pastor Bialte hile amau Kochuam Pastor-te chiat in a enkawl nalai ui. Kum 2007 a hung galkâi a, Pastor quarter's masa pen Sharonphai khua ah sak pat a hia, zia zaw a

chun B.Phainuam Pastor quarters sak zawm kit a hi. Zia lai ah pat haksatna chuam chuam umte lak a khat chu, pau leh hâm kihettualona hi a hi. Communication gap a um a, background chuam chuam kochuam pakhat ah umkhawm a kihi ziak in kipumkhat tak tak a haksas, a lungthuai kit deu le a la um man u'i. Da um tak in 2005 kum in, Unau ECM lam te'n (Tu a EMP-Manipur Synod kitita) Mizoram Synod eila nusia u'a, EPCC lam inle pau leh hâm thu ah buaina ziak in âwlin ei nusia kît tau hi.

EOC (P) leh EOC (ECCI) Kichamna :

Mizoram Synod chun EOC leh EOC (P) te kikâl ah kichamna a um theina ding lampi a hawl zing a, Rev Lalchhuanmawia, Administrative khan nasa tak in mâ ala zing a, khatvei chu EOC Pawl panite a ko khawm a, lawi upa chiakhawmte kêng a sil piak a, kingaidam tua ding leh kicham ding in a dawn ngût ngût hi. Kichamna

ding hawl in Churachandpur District Christian Goodwill Council (CDCGC), ECCI, EBCC leh a dang dang te'n le ma a lau a, maleh gâ a sua tak tak thei diak pua, hun sawttak a lawsap nung in a tawp a tawp in a hung lawting thei khawngta, Dt. November 5th , 2007 ni'n EOC pawlnite chun kichamna suai a kai gêl tau a, Court case zûkdaw in a umta, kochuam Assets/property a thei tiang tiang a kihawm ua, EOC (ECCI) te kiang a compensation kilawm kham tak piak a hinung in kochuam buaina chu nung leh ma gen um talo ding in sukmâi a hita'i.

Kochuam buaina a hung fel phat in EOC (P) te hi Mizoram Synod in Dt. 17th Feb, 2008 ni in a lawmlût thiang a, Secretariat Building le zia ni ma ma hin, Manipur Area office ding ah thiansuana Rev Dr. H. Vanlalauva Synod Moderator-in a nei a, Joint District office I.B. Road ah um chu le, EOC (P) Secretariat ah chawnlut ngâl a hitai.

HINNA VÂK

Manipur Presbytery pianna leh Special Presbytery hawwna:

Manipur Area Kochuam buaina a fel phat in Mizoram Synod kikhawmpi December 2008 chun EOC (P) leh Joint District meeting chu Presbytery pakhat ah siamdaw pha a sa, zia dungzui a chun Dt. 1st February, 2009 in Rev Lalchhanhima Synod Moderator-in Presbytery Thak "MANIPUR PRESBYTERY" kiti chu hawndaw na a hung nei hi. A Kum kit Dt. 8th - 10th Oct, 2009 sung in, Manipur Presbytery kikhawmpi masa pen mat kit ngâl a hi. Manipur Presbytery chun ma a sawn to zêla, Kum thum a hung kivei nung in Dt. 11th - 12th Feb, 2012 in, Presbytery Thak leh Special Presbytery hawndawna Hill-Town Kochuam Biak-In ah Rev C. Vanlalhruaia in a nei kit a, zia Presbytery thak 4 minte chu-

- (1) Lamka South Presbytery,
- (2) Lamka North Presbytery,
- (3) Tânggam Presbytery,
- (4) Phaipi Presbytery-te a hiu.

Presbytery masawwna leh Synod ding ah recommend bawlina:

Synod Policy gual in Manipur Area ah Pastor sêmlaite chu a thei tiang tiang Aizawl tuam ah Assistant Pastor ti minput sak in training a sawl zêl sek a hi. Office Staff-te le a kâl-vân a Synod office munpi Aizawl lama training neisak zêl sek a hia, Laymen te â ding bîk a Kochuam etkawl dante, Sum vawp dante, kikaihuaina lam leh Secretarial training tite haw a kum-kum a nei to pek ahia, KNP leh KKP lam le muthei khawp a nasa tak a masawn in a khanglian u'i. Rev C. Zoramawia Administrative Secretary hun lai Kum 2016 a pat khan Kochuam leh Bialtin ah Budget System pha taka zui pat a hita, thilpiak lama kochuamte masawwna a nasa ma ma, kumtin a Budget a khêl to zal-zal thei a, Synod grant le sukbei hial hilo maleh tam tak kawidaw a hi ta puai. 2019 kum apat khan Mani kitodel thei i hi phatin,

Manipur Area Budget dingle Joint Presbytery Committee-in a en masa zel sek a, lampi chuam chuam a masawn in, Office Building le siamphat (renovate) leh suk changkang a hung hito a, Office chiadan system le kitupzaw zui in chia zel ta a hi. Kochuam malakna keklet zel ah um in, Vaiphei nam sung ah HAUSATE, YVA-te, leh Synod Unau dangte tawh kipawlkhawmna hun bik matkhawm zel sek a hia, CKKP level ah le Kochuam dangte tawh fellowship programme nei khawm zeu-zeu sek a hi. Pastorte leh Pro Pastor te bik a Aizawl ah retreat programme-te, Pro Pastor orientation-te natiang Manipur lam ah mat a hung hi ta bawh hi.

Kochuam a hung mumal deu deu tak zia kin Manipur Area committee chun 2015 kum in Manipur Area hi Synod ah siam/langkai ding in Mizoram Synod a dawn a, Mizoram Synod in kumkhat ei ngak sak zaw'un, Synod kikhawmpi 2017 chun PCI Genel Assembly ah recommend ei

bawltu a hi. PCI Biennial General Assembly 2018 kum ah genkhawm ahia, Study bawl phawt ding in SEC khut in a kawia, (PCI Gen. Assembly Resl. No. XIV. Dt. 3rd, May, 2018), PCI Executive Committee chunle (XIII.3.(i),(ii), 1-2 Aug, 2018) zia chu bawzuito in Study Team khat a siam dawka, Study Team-te hin Manipur Area office a hung chuanua, zilchianna a hung nei nungun a lungtun thu'u PCI Executive Committee 2020 in a tut ua tichun, General Assembly ah Synod recommend bawl na chu thelut a hita'i. {Executive Committee 2019 Resl. NO. VI.7. (i), (ii), (iii)}

Tangphai Synod min phuakna:

Manipur Area Synod min (Nomenclature) ding PCI ah piaklut ngai a hi zia kin Manipur Area Joint Presbytery Committee ko a hia, (Joint Presbytery meeting - 16 veina Thupassed No.-5na) meeting chun, Synod min ding chu Pastor Bial kikhawmpi

HINNA VÂK

chiat ah genkhawm masak pawt ding a ti dungzui in a hun genkhawm chiat tau'a, proposal chuam chuam 10 te chu Bial 19 apat in a hung lut hi. Tichun, Joint Presbytery Committee-17 veina a chun genkhawm kit a hia, kilungtuak tak tak na a um theilo phât in Administrative Secretary Rev C. Zorammawia khutin a kawi a, Synod Thak min ding in **Tangphai Presbyterian Church Synod** ti hi a hun têt dawкта a hi. A min zikdan a hin Rev C. Zorammawia gendan gualin Nau min kiphuak a hi ziakin, Tâng-Phai ti hilo in, Tângphai tia zik zawm ding a hi ati a hi. Tangphai Synod ti min hung phuak dawktu masa pen chu, Rev K. Lala, Salem Veng a hi. Kikhawmpi munkhat a hin zia min hi ala pawdawк a, himaleh nawl piak in a um a, New Lamka Pastor Bial kikhawmpi in a hung pawdawк kit a, tichun, Pathian lemguat hi ngei ding a hia, zia min hi namdet in a umta a hi. PCI Assembly tiang in le **"TANGPHAI SYNOD"** ti

min hi ei pawm piak tau a hi.

Tangphai Provisional Synod Hawнна:

44th PCI Biennial General Assembly, Umroi (29th April, 2022) Vaihawmna [Resl. NO.XI.2.(1),(2),(3)], chun Tangphai Provisional Synod piak ding lem a sak phât in PCI Executive Committee in a bawzui ngâl ah, a hawнна programme le a hun siam ngâl ua, zia chu bawzui in Detail programme leh a hawнна mun dingte chu Joint Presbytery in a guat kit a, zia chu MA Committee siamphat ngaite hun siam pha'n a pawm ta a hi. Tangphai Provisional Synod hawнна chu Dt. 20th Nov, 2022 (Pathianni,10:30 am) D. Phailian Pastor Bial, Jubilee Kochuam Biak-In ah nei a hia, mipi 2000/- vâl deu bep chiakhawm a hia, zia chun, Minister-te, Pastor-te, Pro.Pastor-te, Presbytery Standing committee member-te, Bial Puitute bep a pang u'i. Ziatak ahin, PCI Palaite, Mizoram Synod lawi upate

leh Administrative Secretary lui pathumte le a hung pang thei ua a kipak um ma ma hi. Synod hawna hi Thupi taka nei a hia, Mizoram Synod in kipakpina'n refreshment man ding Rs. 5/- Lakhs (Nuai Nga) a hun tuak dawk a, mimal leh Pawl chuam chuam apat in le thilpiak lûl tak takte a kidawng hi. PCI Moderator Rev. B.B Lamin in Tangphai Provisional Synod hawna a neia, Provisional Synod Choir-te'n Pathian pâkna La hawitak a lem ua, PCI Secretary (Sr) Rev Dr. K. Lallawmzuala in Tangphai Synod Puitu-te leh Committee member chuam chuam ah pangte tâklatna a nei ngâl hi. Programme hi Sunnung lam ah Cultural programme etnawp um leh mittai takte thîlkhawm in, zân lampang ah sermon hawi tak takte ngaithak ahi bawk hi. D.Phailian Bial leh Jubilee Kochuam pangkhawm thiamna zal in thazo tak in ei zintun ua, office lam inle theitawp a sua bawk ah,

TANGPHAI PROVISIONAL SYNOD hawna chu thupi tak leh kilawm taka matzaw a hita'i. Lalpa'n lopina changta hen.

Khumkhakna: Tangphai Synod hi mite'n ei etthâk zinglai a hi ti hemil puai tiu. Ei kipâkpi ah ei entawn leh ei demsia le um ngei ding a hi. Pathian zâla zia tiang tung thei ihiu a, Kochuamte i kipumkhatna zâlu le a hi. Tangphai Synod hi mite'n a hawina a hun mu deu-deu ua, Kochuam a hât a, a hung thupi sêm sêm theina ding in, i lakua kipumkhatnate, thutaknate, ginumnate, i nei zingu a pawimaw hi. Nam hât leh pilzawte khun Mani â him him a zapi ngailo gualun, i kochuam hi mani â gual liau liau in ngai hitin, kinei sak hitin, kipawse leh kichuam kawite umsak puai tiu. Tangphai Synod hât leh hâtlo hi mitin khut ah kinga leh i mawpuakna'u a hi ti hezing in, tu ah i tunna tiangu hi huntawk sa mai puai ti'u.

KAP HUANG

KHAWVEL PAUCHAP NI (World Day of Prayer)

Khawvel pauchap Ni hung kipatna hi kum zabi 19-na lampek ah USA leh Canada nûte'n, khawvel mun chuam chuam ah, chanchinpha puanzâkna ah numeite panlâkna sukhâtna ding ah ala pat daw uh a hi. Zia Ni hi, kum sîn March tha Ziltawp Ni masapên ah mat a hia, pauchap Ni thawlawm kidawl dawkte hi panpina nasepna leh Khawvel Pauchap Ni tawsawtna ah mat a hi.

Zia nasepna hi tawh kizawpmatte chu:

- Naupangte leh nûte ngaikhawkna
- Chanchinpha puanzâkna ah pauchapna pawimawna
- Khristiante kipumkhatna di mathîl
- Bible sim hi mi zosia mawpuakna a hidan
- Gâljamte lak leh khawtâng siamphatna nasep
- Chanchinpha puanzâk leh khawvel ah chamna zawpkhawm

Kum 1926 in North America nûte chun Pathian Biakna hi gambung chuam chuam leh akizawppi'u chanchinpha puangzâktute kiang in a thêzâk ua; zia chu thatho tak ah dawnsawn a hi zia in,

Khawvel Pauchap Ni hi a hung phudawk ta'u a hi.

Khawvel Pauchap Ni hi khawvel pum huap vâiguan, chawndan chuam chuam a pat Khristian nûte'n, kum sîn ah Ni kibang in a mang sek uh a hi.

Nam, chawndan leh khawsakdan chuam chuam, gambung 120 sâng ah tamzaw pangkhawm in, zia Ni hi Pathian biakna leh Pathian thu kihiltuana mat a hi.

Khawvel Pauchap Ni mangcha'n khawvel ah Khristiante chu:

- Jesu a ginna'u a suhdet thak ua,
- A kinepnau, a launau, a kipaknau, a dânau, a hunphau leh a pawimawteu a kikumkhawm sek ui.

Khawvel Pauchap Ni mangcha' i kitilkho na di'u a hi leh:

- Khristian chawndan chuam chuamte ginna apat ki sukhât
- Midangte haksatna ngaitua piak ah, pauchap piak
- Achuam kêi ah um talo ah, khawvel pumpi hiatchianna.

Kum sîn Khawvel Pauchap Ni hin thupi pawimaw tak a nei sek hi. Zia â ding ah kisaklawkna leh va-panna apat hin, gambung chuam chuamte'n bang gual in amau tawh kituak in, Bible thu a dawng uh em? ti a het thei hi. Amau ngaikhawk lam leh a pawimawte'u het thei a hi bâk in, amau tawh kipumkhatna ei neisak a hi. Zia bân a chun, Khristian ginna hausakdan leh thûkzaw leh lianzaw' a khanzêldan ei muchian sak hi.

Malam ah Thupi dite leh panladite chu:

2025 Lamdang tak ah ka hun siam la hiu (Cook Islands)

2026 Hung in, chawldamna hun piang ka (Nigeria)

2027 Chamna leh Dikna umna ding ah Pauchapkhawm (WDPIC)

2028 Hepina ah puihuai (Costa Rica)

2029 Ngaikhawkna'n Damna a tut hi (Italy)

2030 Khawvel a chawdam chun, mite'n an a ne thei ui (Nepal)

2031 Ginna teptêna (Jamaica)

International Committee:

Khawvel mun chuam chuam in, gambung chuam chuam apat Committee palâite chu, kum li ahiloleh kum nga danin a kimukhawm sek ua, a hetnau leh a nasepteu a kikumkhawm ua, mabân thupi di a genkhawm ua, chuleh a khanto zêna di a genkhawm sek uh a hi.

Zia Khawvel Pauchap Ni mangcha hin, Khristian nôte chun, pauchapna leh nasep hi khendan theilo a hidan leh zia tê ni hin khawvel nasa tak ah a thawndan a suhdet ua, a pawm uh a hi.

KKP HUANG

KKP GENERAL CONFERENCE 2024

Khristian Khanglai Pawl General Conference 13 – veina hi Sugnu Pastor Bial in a zintun ding ua guat a hi. Sugnu Pastor Bial te hin Dongjang Kochuam Biakin ah zintun ding in aki guanggal ui. Conference a ding ki guanggal na chia zing lai in ni 3rd May, 2023 in Gamsung hung buai in Sugnu Bial le a hung sukha, Sugnu Tribal, Bial Centre leh Sokom Kochuam te chu halthak in a um ua. Bial sung ah Kochuam dang te le Galbuaina Frontline a hung hi ta. Zia dinmun a hi zing lai in, Sugnu Pastor Bial Standing Committee chun Conference zintun theilo ding thu CKKP kiang in a hung tut ui. Zia thu chu CKKP in ngaitua khawm in, General Conference 13 – veina hi D. Phailian Pastor Bial in a zintun ding un phasak a hi. D. Phailian Pastor Bial chun CKKP dawtna chu pawm in Conference zintun ding in a kisingsa pan ui. D. Phailian Bial hin 2014 kum in Genera Conference ala zintun hi. Gamsung dinmun te en in

tuchung General Conference hi Programme a awlsam thei pen ah mat ding lemsak a hi dungzui in, Zan Programme leh Fellowship Programme te siamlo a hi.

KHRISTIAN KHANGLAI PAWL CHANCHIN CHAWMKIM

Mizoram Synod in Manipur Area hi 16th December, 2001 ni'n a hung lawplut a hi. Joint District MPCS Meeting masa pen (Joint District Khawmpi tina a hi) Kangvai Biakin ah 10th – 13th October, 2002 sung ah kimang ah chun, Khanglai Pawl leh Numei Pawl mun khenkhat ah ding ta te dinmun ding leh a Pawl min ding uh sukchian piak ding ah dawt na, Synod ah tut ding in ala genkhawm ui. Zia thu chu Manipur Area Committee 5: 10 na ni 15th October, 2002 chun ala gen khawm ua, Synod Executive Committee (SEC) ah ala tut uh a hi. Synod Executive Committee (SEC) in Khanglai te chu Manipur Area Kristian Thalai Pawl ti'n min a hung phuak piak ui. Rev. Lalchchuanmawia, Administrative Secretary,

khan lemchanglo ah ngai in Presbyterian Youth Fellowship (PYF) tin ala theng hi. Joint District MPCS meeting ni 26th November, 2004 in PYF Committee masa pen zia gual hin ala tel ui:

Leader : Rev. Rohmingliana,
Lamka

Asst. Leader: Thangminlian,
Suangpha

Gen. Secy. : H. Lunneilal,
D. Kholunphai

Asst. Secy. : Pausiam,
Kangvai

Treasurer : Zamjathang,
Lamka

Fin. Secy. : Th. Thianlal,
L. Munlui

Zia puitu te malatna'n Torbung Kochuam Biakin in Conference khatvei na 21st – 23rd January, 2005 sung in nei a hi. Zia hun a chun KKP hi Presbyterian Youth Fellowship (PYF), Mizoram Presbyterian Church Synod Manipur Area ki ti a hi. PYF min hi Khristian Khanglai Pawl ah then ding in Lamka Bial in PYF General Conference 6 veina 12th – 14th February, 2010 sung ah um a chun a

hung pawlut ui. Zia Conference Vaihawmna L. Suangtun Kochuam Biakin, a chun zia thu hi genkhawm in Manipur Area Committee khut ah kawi ahi. Manipur Area Committee chun hung zilchian in PYF chu Presbytery Khristian Khanglai Pawl (PKKP) ti ding in A/S a pat lekha dawn ahi. Zia dungzui chun 14th July, 2010 apat in PKKP chu mat pat a hi. Zia zaw a chun ni 8th September, 2010 in A/S apat lekha dawn in PKKP chu Khristian Khanglai Pawl, Manipur Area ti ding in hiatsakna mu ahi gual in, zia min chu mat ngal a hi.

KKP Kikhawp Ni

2009 ah KKP 5th General Conference Vaihawmna General Agenda: 9 na KKP kikhawp ni hi kibat sak ding thu genkhawm in, KKP kikhawp Ni ding in Simhaini Zan lemsak a hi. Zia zaw a chun KKP General Conference 7 veina S. Kawtlian Kochuam Biakin ah ni 23rd March 2012, Vaihawmna General Agenda II: 1 na'n KKP Kikhawp Ni genkhawm kit a hin Manipur Presbytery Standing Committee in a guat

HINNA VÂK

gual ah KKP Kikhawp Ni hi Seppatni Zan ah mat tak ding in lemsak a hi.

KKP Emblem

KKP Vaihawm Kikhawp 1 veina Lamka Kochuam Biakin a chun General Agenda IV: 9 a chun KKP Emblem chung chang genkhawm a hin, a design, a thu te Presbytery Standing Committee a tut ding phasak a hi. KKP thupi – “Thilpha bawl ding ah hukdam” a nuai lam ah zik ding in pha sak a hi.

KKP Flag


KKP 5th General Conference Vaihawmna Thingkeu Kochuam Biakin ah 14th February, 2009 ah chun General Agenda: 4 na chun PYF Flag nei ding lemsak a hi. Zia zaw a chun General Conference 8 veina, New Lamka Kochuam Biakin in ni 22nd March 2014 Vaihawmna General Agenda V: 3 na KKP Flag nei ding lemsak a hin, Central Committee in a hun bawzui ding in phasak a hi. KKP Flag chu zia gual hin siam a hi. a dung lam 45 inches, a vailam 30 inches, flag rawng hi a chunglam 15 inches a kang

hi ding, a nuai lam 15 inches hi van-dum rawng hi ding a hi. A kang lam ahin KKP logo a lai ah um in tin, a nuai van-dum rawng a hin – Khristian Khanglai Pawl a rawng kang ah zik ding, zia nuai a chun Central, Bial leh Branch min te zik ding a hi. Central Committee hi sana rawng ah zik ding, Bial min hi a vawm ah zik ding chuleh Branch min a kang ah zik ding a hi. Zia a nuai ah gual hin siam a hi:

i) Central Committee :



ii) Bial a :



iii) Branch a :



KKP Day

Ni 12th March 2016 ah Munpi Kochuam biakin in General Conference 9 veina Vaihawmna General V: 1 na KKP Day nei ding thu genkhawm a hin, KKP Day hi nei phasak a hi. Zia hi Manipur Area Committee tut to ding in phasak a hi. Kochuamte Mizoram Synod in a hung lawplut ni – 16th December, 2001 chu KKP Day ding ah mat hileh” ti in Manipur Area Committee ah tut to a hi.

Zia dungzui a chun Manipur Area Committee ah chun proposal tut to a hi – “KKP Day ding chung chang Central Committee in zilchian na nei a hin, Manipur Area Kochuamte Mizoram Synod in a hung lawplut ni – 16th December,

2001 chu KKP Day ding ah mat hileh” ti in Manipur Area Committee ah tut to a hi.

Zia thu chu Manipur Area Committee 47: 4 na ni 8th February, 2017 chun a hung gen khawm ua, 16th December chu Kochuam pumpi a ding ah ni pawimaw a hi ziak in KKP Day ding ah chun lemchang puan ah ti ziak in A/S Office in hung zilchian zaw diak hen ti in thupukna a siam hi. Zia thu chu Administrative Secretary, Rev. C. Zoramawia chun bawzui in, zilchianna a nei lai in record lui dang mu ding um jiang ta lo a hi ziak in, Joint District huap ah Khanglai Conference masa pen ahun lai ah – Joint District Presbyterian Youth Fellowship (PYF) Conference ni 21st – 23rd January, 2005 sung ah Torbung Kochuam ah kimang chu pansan in, 21st January chu KKP Day ding in Manipur Area Committee 48 na ah chun a tut hi. Zia chu Manipur Area Committee chun a pawm ah, kum 2018 apat mat ngal jiang ding in **KKP Day chu January 21** ti in puandaw a hi tai.

HINNA VÂK

KKP Conference leh Vaihawmna munte

Zia anuai ah mun leh hun ah te hin KKP General Conference leh Vaihawm Kikhawp nei ala hi. Vaihawm Kikhawp masa pen ni 4th March 2011 a hin Kiginni Vaihawmna chau nei a hia, Biakna kikhawp leh Programme dang neilo ala hi.

A mun	A hun	A Thupi
Torbung	Jan. 21-23, 2005	
Kangvai	Jan. 19-22, 2006	<i>"Lalgam siamthak hi tiu" 1 Samuel 11:14</i>
Lamka	Jan. 19-21, 2007	<i>"Khrista ei matlawna pen chu ka tuk det theina ding t'i'n, ka del ham ham a hi zawi" Philippi 3:12b</i>
Phainuam	Jan. 18-20, 2008	<i>"Aw Israel, la Pathian tuak ding in kisa zo in" ~ Amos 4: 12</i>
Thingkeu	Feb. 13-15, 2009	<i>"Keima ka thiantho gual in, nanghaw le la thiantho diu ahi" ~ 1 Peter 1: 15 - 16</i>
L. Suangtun	Feb. 12-14, 2010	<i>"Chanchinpha hun tuntu te keng chu a melpha na lawm lawm e" ~ Rom 10: 15</i>
Lamka (V* - 1)	March 4, 2011	<i>Vaihawmna chau um, kikhawpna um lo</i>
S. Kawtlian	March 22-25, 2012	<i>"Tho in la, vak in" ~ Isai 60: 1a</i>
Mata Vengpi (V - 2)	March 8-10, 2013	<i>"Khanglai Jesu zui din"</i>
New Lamka (D. Phailian)	March 21-23, 2014	<i>"Lal Jesu tawh"</i>
New Lambulane (V - 3)	March 6-8, 2015	<i>"Ginumna"</i>
Munpi	2016	<i>"Mi Zosia hiat leh sim la hiu" ~ 2Korinth 3: 2</i>
Dumlian (V - 4)	March 10-12, 2017	<i>"Tho in la, la Pathian ko in" ~ Jonah 1: 6</i>

March 2024

A mun	A hun	A Thupi
Kangvai	March 9-11, 2018	<i>"Khawitak ah um la hem?" ~ Thilsiam 3: 9</i>
K. Tangnuam (V – 5)	March 8-10, 2019	<i>"La hatlai in chia in" ~ Vaihawmte 6: 14</i>
Mata Vengpi	2020	<i>"Pathian Kochuam" ~ Matthai 16: 18</i>
Leijangphai (V – 6)	March 12-14, 2021	<i>"La chawt na ta phawt chu la gam hi zel in a" ~ Joshua 1: 3</i>
Lamka	May 13-15, 2022	<i>"La gam hung tung hen" ~ Matthai 6: 10</i>
Phailianbung (V – 7)	March 10-12, 2023	<i>"La hinnau humbit na ding in</i>
Jubilee	March 9-10, 2024	<i>"La siamtu he zing in" – Thugentu 12: 1</i>
* Vaihawm Kikhawp		

Anngawl Pauchapna

Achia ta ni 28th February, 2024 (Nilaini) in Lamka Pastor Bial in Bial huap KKP anngawl Pauchap khawmna a nei ui. Zia anngawl pauchap na hi Lamka Kochuam ah nei ahia, zingkal lam dak 07:00 am apat in dak 11:00 am chan in nei a hi. Mi 50 val aki pang thei hi.





SUNNA

UPA PAUTINLAM

(1933-2024)



Famta Upa Pautinlam hi (L) Upa Genzapau leh (L) Pi Soitinkhawl gil ah ga a pathumna ding in, 22-02-1933 kum in Kangvai khu'a'n a piang hi. Suapi pawsal panga(5) leh suapi numei pathum(3) a nei hi. Zia te chu

1. (L) Niangneikim w/o (L) Th. Lamkam, Chief of Kangvai
2. (L) Major Lalkai Vaiphei H/o Pi Lalremmawi
3. (L) Kaikhogin, IFS H/o (L) Pi Nemting
4. (L) Nemzakim w/o (L) Kaihau Vaiphei, IDAS
5. (L) Thongkholal, Asst. Manager(MSTRC) H/o (L) Kanshi
6. (L) Thianngaichong W/o Pastor Kailum
7. Upa Remlalthang Vaiphei H/o Phalianting

A ma hi 29-05-1962 kum in Pi Chongneikim tawh (L) Rev. Tongkthang in Biak In hawng in a la kichen sak hi. Gil aga malsawmna cha Pawsal 4 leh numei 1 a nei u'i. Zia te chu-

1. Nk. Niangthiannem
2. (L) Upa Dr. Paulunmang Vaiphei H/o Pi Lamneimang
3. Khaitinlian, Retd Bank Manager H/o Pi Engzami
4. Upa Kaiminthang H/o Pi Niangjoykim
5. Kaidavid, PO(DRDA) H/o Pi Excellent
Chun, minsak panga(5) a nei hi.

Taksa khawsakna lam ah mi fel leh tawmngaitak leh Pathian ngaina ma ma mi a hi. Thiam zilna lam ah Mangasuba(Class-II) merit Scholarship a la dawng hi. Kochuam leh khawtâng a ding ah kingakna khuampi pawimawtak a la hi zing hi.

Kochuam leh khawtâng ah a hina te :

1. Upa Ordination- 10-02-1982 Kum in RCG General Assembly Khawmpina ah (L) Rev. Soikhothang khut in a la chang hi.
2. Kangvai Village Authority member masapen hi ding in 1951 Kum a pat in hun sawttak a la pang hi.
3. B.D.C (Block Development Committee) SDO Churachandpur nuai in term khat a la pang hi.
4. V.N.O (tu ah VPC) Cabinet member in term 10 tiang a la pang hi.
5. V.C.A (Vaiphei Christian Association) member in a la pang hi.
6. Kangvai Village Lamp Society in term khat a la pang hi.
7. R.C.G (Revival Church of God) Mission Treasurer in 1976 Kum in a la pang hi.
8. Church of God (Full Gospel) Moderator, 1999.
9. Church of God (Full Gospel) Treasurer, 1993-1997.
10. Mizoram Synod Manipur Area Committee Member.
11. Kangvai Pastor Bial Chairman leh Treasurer.
12. Kangvai Kochuam Committee Vice-Chairman leh Sunday School hotu.

A hiselna lam :

Kum upat lam a hung hi in Damlona chi chuam chuam hun nei in, Doctor chuam chuam kietkaw! sak in, huitung tak ah Kum 90 val a dam nung in lungchang natna hung puang chu theitawp sua ah etkawl a hi nung ah a natna thuakzo talo in Dt. 24-02-2024, 10:45AM vel in a it a ngai cheng nusia'n a na a sep piak Pathian kiang in a chawldam ta'i.

In mun ah Upa B.T Khampu in hun mang in Biak-In ah Upa Nengkhothang, Moderator Lamka North Presbytery in vuiliamna hun a mang a, than mun ah Rev. S. Khaikholam in hun mang in 24-02-2024 ni ma chun vuiliama hi ta'i.

Report petu
Rev. S. Khaikholam
Secretary
Kangvai Kochuam